

HE ROPU MO TE AO HOU.

Otatarakahika,

Patutahi, 8th Aperira 1927.

Ki te Etita,

E hoa tena koe. E hara; na te awangawanga o te ngakau i tuhi ai ki a koe. Kei a koe pea e mohio ana; kei nga tini kanohi e korero ana i te Toa Takitini e marama ana. He ahakoa, e tumauako ana au ma katoa o te Iwi Maori e tirotiro e uiui.

Ko maha nga tau inahinei te timatatanga o te Ropu o nga Tamariki o Te Aute, muri iho ka whaka-whanuitia ki te Iwi katoa, ka kua taua ropu ko "Te Ropu Taitamariki Maori" (young Maori Party). Kua tupapakutia, inahoki kaore e rongona ana tona reo.

E hoa, ki taku nei titiro, i te wa e mahi ana taua ropu, pai ana; ara: i whai reo to tatou Iwi. I tenei wa ka uiui ka tirotiro; aue kua kore. He aha ra?

Ki toku ake whakaaro ma te whakakotahi i te Iwi e puta pai ai nga hiahia me nga wawata tika e eke ai he painga ki a tatou. Ara, ka hoki ki te kupu a to tatou Matua a Tima Kara (kua wehe atu nei ia i tenei Ao) "Tatau Tatau." Me pera me whakakotahi, me pupu, whitiki rawa.

Kanui nga tikanga e oti i taua Ropu ina whakahearea, na koutou tonu ia nei e whiriwhiri, tera te tangata e oho, i te nui, i te ruhi me te whanui o ana take.

Kia mau mahara, me uru nga Tai e Wha ki tenei kotahitanga, ma reira anake e oti ai he reo mana he reo tuturu mo tatou mo te Iwi Maori.

E te Iwi, E oho! Maranga! Kia mataara!

Kati noa mo inahinei kia kite iho au e oho ana te Iwi, hei reira tuhi ai i etahi whakaaro.

Tena koutou e te Iwi,

NA TUTEPUAKI.

PIHOPATANGA O WAIAPU.

O TATOU PARIHA.

I panuitia i tera marama nga nama kei runga i tena pariha i tena pariha. He nui te hari o totatou Tari Pihopatanga mo te whakaaro nui mai o nga komiti ki te whakahaere tikanga hei whakamama i nga taumahaatanga o tena o tena. He tau uaua rawa tenei mo nga whakahaere moni i te mate e pa nei ki te Tominiiana ka'oa o kiia nei ko te "slump." Noreira e nga hoa he nui rawa te whakamahi ki a koutou katoa e aroha mai nei ki te reo karanga o te Tari kia whakamamatia ona taumahaatanga.